

四庫全書

集部

欽定四庫全書

集部

元憲集卷一至四

詳校官監察御史臣李陽斌

檢討臣何思鈞覆勘

總校官進士

臣程嘉謨

校對官編修

臣勵守謙

謄錄

監生

臣黃紹伊

御製題元憲景文集並各書其卷首

宋庠宋祁兄弟同負盛名且同舉進士時以大小宋並稱乃其官位一至宰輔一為尚書事業所就既殊情性亦奢儉各異故其詩文沈博新警因各隨其性之所近而為世所傳誦則同及戒其子不令刊類文集行世亦同迨其後雖經合刊繼而仍歸散佚又同茲復裒輯成集並以聚珍版印而流傳之又無弗同其同不同之故庠與祁固無能知之余亦烏從而知

之然其散也由於自欲韜晦而其聚也幸有永樂大

典之僅存佚之於七百餘年以前

宋天聖至今七
百五十餘年

而

完之於三百餘年以後

明永樂至今三
百七十餘年

則又復歸於

同余因合題一詩並冠於兩集簡首更使之不同而

同則向之所謂同不同者皆可勿深論是之謂大同

二宋合刊曾紀王

宋嘉定間郡守王允初倡議欲合刊
二宋集以屬郡文學陳之強未就而

去其後太守陳希捐
資刊成之見之強序

惜哉分集失傳詳學如有本終難

晦行不負言久益彰伯也孤風標雅操仲兮強識富文

章雖稱儉過及奢過弗愧元方與季方收拾碎珍得全
冊吟題七字冠前行休嗤大典紛割裂愛禮幸茲存餽
羊

元憲集序

荆湖之間國朝以來安州為望郡名公鉅卿相繼而出
元憲景文宋公伯仲則其傑也昔太守今右司李公揆
繪其像而立之祠逮之強之來請于郡而春秋致祭亦
可以夸示後學矣然宋公之典型雖在而文集不傳于
鄉郡謂之闕典可也寓公李令尹之家舊有繕本太守
今都運王公允初昔為通守每與之強言欲借而刊之
未能逮持節京西于其行以帑藏之餘幾千緡屬之強

與之鈔本以廣其傳又分數冊以往將以速其就也然
攷之二集既富且贍其言八十餘萬工以字計為錢幾
四百萬米以石計百有二十他費不預焉之強懼其難
成而白之今太守陳公芾公一聞之欣然謂之強曰是
亦予志也郡當瘡痍之後雖賑恤施予日不暇給然亦
當輟他費以成之二公政事文章兩極其至故能于倥
偬艱難之際而為粉飾治具之舉其與蓄財而不知予
妄費而不知用者豈不大有逕庭耶之強深有感焉因

其成也書之篇首以告來者若夫贊元憲景文之鉅篇
大作則有國史在于前輩之鋪張揚厲而為之序則之
強晚生不敢措辭觀是集者自當知所敬歎今之序姑
記其文集之傳云爾嘉定二禩三月上澣郡文學陳之
強序

欽定四庫全書

集部三

宋元憲集

別集類二宋

提要

臣等謹案宋元憲集四十卷宋庠撰史稱庠所著有國語補音三卷紀年通譜十二卷別集四十卷掖垣叢志三卷尊號錄一卷今惟國語補音有傳本已著錄餘書與文集並佚

國朝厲鶚編宋詩紀事僅採掇西清詩話侯鯖錄合璧事類揚州府志所載得詩八首則海內絕無其本已三四百年矣永樂大典修於明初距宋末僅百餘年舊刻猶存故得以采錄而庠文章淹雅可取者多故所載特為繁富今以類排比仍可得四十卷疑當時全部收入也方回瀛奎律髓載夏竦守安州日庠兄弟以布衣遊學席上各賦落花詩竦以為

有台輔器趙令畸侯鯖錄亦云二宋落花詩
為時膾炙今考庠詩所謂漢皋佩冷臨江失
金谷樓危到地香祈詩所謂將飛更作回風
舞已落猶成半面粧者特晚唐濃麗之格實
不盡其所長祁集有和庠赴鎮圃田遊西池
作極稱其長楊獵近寒羆吼太液歌殘瑞鵠
飛句歎其驚邁蔡條西清詩話亦稱之又載
其許昌西湖詩鑿開魚鳥忘情地展盡江湖

極目天曠古未有然集中名章雋句絡繹紛披固不止是數聯也文章多館閣之作皆溫雅瑰麗渢渢乎治世之音蓋文章至五季而極弊北宋諸家各分起振作以追復唐賢之舊穆修柳開以至尹洙歐陽修則沿洄韓柳之波庠兄弟則方駕燕許之軌譬諸賈董枚馬體製各殊而同為漢京之極盛固不必論甘而忌辛是丹而非素矣陳振孫稱景文清

約莊重不逮其兄以此不至公輔今觀其集
庠有沉博之氣而祁多新警之思其氣象亦
復小殊所謂文章闕乎器識者歟書錄解題
載是集作四十四卷與史不合然文獻通考
亦作四十四卷似非訛舛疑別本以掖垣叢
志三卷尊號錄一卷編入集中共成此數唐
宋諸集往往有兼收雜著例也通考於是集
之下又附註曰一作湜中集二十卷其名又

異然永樂大典實祇標宋元憲集則非湜中
集明甚故今仍舊目不取通考之名焉乾隆
四十九年十月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

欽定四庫全書

元憲集卷一

宋 宋庠 撰

賦

乾元節賦

炎厯四世天子坐法宮憲宗軌深根寧極遠聽高視其
仁如天其道如砥璽疊穆穆為綱為紀方且秋駕軫慮
宵衣致治櫟申卧鼓張旃厚篚至和薰而桀驚革鴻澤

淪而翔蠢暨龜龍宅沼牛羊避葦民遠于罪畫衣冠而
知禁吏久其職保子孫而為氏禮無未補之闕樂有既
盡之美日月之所燭霜露之所墜舉踵延頸莫不率俾
而乃辰居乎蠓護宇泰乎醴粹起真想于黃庭邈慶源
于赤水陶鈞之所獨運聲教之所橫被遐哉邇乎越不
可載而已先是有司據舊典輯元命因誕彌之吉序稽
長發之休詠攷乾健不息之象含元長體仁之性作為
佳節冠于甲令將以合萬國之歡啓千齡之聖掩周漢

而遐蹈齒堯顓而高映寔明寔昌惟天下正則是禮也
宜我朝而為盛若乃仲呂鳴律恢台御時斗建于巳舒
將望義授赤光照室之瑞叶寶軫歌薰之期內外欣踴
官師肅祇於穆先靈辰備宿設善氣前應游氛外徹開
闔闔之洪洞廓紫宮之寥沏飛龍抗殿神螯負闕若夫
宣室先帝之正寢大火天王之明堂啟稷嗣以辨等率
鴻臚而詔方采物紛樹衣纓焜煌金匏畜響而待叩簫
翟旌敷而啟行庭實萬品天幕九張噦鑾卓馬之覲戴

斗占雲之鄉碧丹文越効其質毛車象戴輸其祥或布
護于外庭或就望于西廂其內則上宮碩老袞衣繡裳
元侯顯父珍圭判璋麟定之親信厚而在列鷺雁之客
潔白而來翔莫不委佩垂紳肅穆端莊以俟乎當陽始
乃警大庭導初旭織羅靡動羣陰盡伏輦出于房帝暉
有穆正法座于皇極凝邃旒于元服燦乎若瑤極之御
羣宿澹焉若天池之朝百谷塗山會兮後萬玉華封來
兮善三祝豈徒揚甚盛之節蓋將儲難老之福況乎鸞

襟虹渚天啟也雖曠代而罕至重瞳采眉君表也惟元
聖而後備畫堂甲觀昭漢嫡之祚金鑑露囊盛唐宮之
制蓋所以謹帝胄之正統鍾天元之粹氣謹聲身而為
律度聰神明而資孝悌作我司牧光有神器若夫定默
之至數重熙之高致蘊上業而未發候昌朝而來萃則
不若是也于是丞相奉觴而進曰臣聞德之所積者厚
則天之所報者隆道之所召者遠則神之所贊者聰今
陛下尊祖襲宗寢威盛容退奸士以進道斥彫纂而敦

金匱要略卷之十一
風嚮學乎金華之殿因心乎長樂之宮程百斤以忘倦
慎萬幾而執中而猶翼翼以惠迪謙謙而養蒙宜乎繼
萬世之典業藹千祥于聖躬煥至德而有融等仙劫而
無窮者也臣不勝大願昧死上後天之壽制曰都此高
厚之降康宗祐之流光俾爾熾而昌俾爾壽而臧朕其
志哉所不敢忘恭舉公之觴時左右皆稱萬歲

幽摠賦

暗室迷陽開疏就方匪結錢而效飾將修隙以闕光森

豎櫺之寸漏限橫杙而尋長逼南榮之愛日蔽高廡之
飛霜隱几于下陳篇在旁舍階筠之媚色洩盤蔥之幽
香沉復霽景初和游氛外滅輕吹襲牖顏陽溢穴映故
網而輕明渺方紗而洞徹但見野馬羣飛纖蟲族悅或
蟻蠓之上擊或醯雞而下頡輕若毛舉來踰電掣隱見
互舉如翳如空渺倦目以旁睇監衆態之無窮其來也
就煦以交舞其處也假照而相攻瞥若浮埃之聚恍如
纖靄之蒙馳驚乎蠅頭之域游揚乎蚊睫之宮形不任

金匱山房集卷一
乎手搏聲難為乎耳聰嗟大鈞之賦象何至細而兼容
忽輕飆之一至兮遂消散而無蹤

登應州古城賦

何茲城之嶮圻兮據東北之山巔扼三關之走集兮眺
七澤之敞閒喬木矗其雄立兮森萑萑而刺天翔風薄
而長吟兮雜下瀨之潺潺南陵漸其岝峿兮盡渺渺之
雲烟于是太陽啟暉六幕澄霽春暎如繡春樹如薺啼
鳥噪噪蒼烟故壘登高遠望使人心瘁在昔峻宇層構

雕粉繡楣車爭水度蓋逐鴻飛鼓鐘沸涌冠劍陸離抗
障日之長袂艷從風之羅衣至矣哉合從締交結傳附
黨兵略地而鼓行師椎牛而人饗梟鳴牙中梯舞樓上
出萬死而徇國俟千級而邀賞莫不光沈景滅魂斷心
折千萬斂魂野難凝血同枯骨之死安知譽堯而非桀
哉但見灌叢宿楚奧草多露城狐不薰臺廐時聚虎肉
委蹊豺牙當路欽失木而號煙颺投林而嘯雨遇發冢
之詩書對憂心之禾黍曲池既已平高臺又以傾古隄

時見荒榛自生叢祠陰塢虛聞松聲凝睇弭節悵然內
驚嘆人事之遞遷孰長年之能執壯率歡以俱往牽引
悲而前集昔牛山之妄歎顧二臣而飲泣使爽鳩之無
死非吾君之所及諒迭處而迭去同寒暑之相襲況乃
僕本恨人觸感增慕歲月逝矣江山非故古既古而膏
今今雖今而將古天愁人兮安寄日難揮而催暮命僕
夫以効駕吾將遵乎歸路

夫人城賦

并序

昔晉將朱序守襄陽為苻丕所圍序母韓氏自登城按
履謂西北角當先受弊遂領百婢及城外中女丁于其
角斜築二十餘丈賊攻西北果潰衆固新城丕遂引退
謂此為夫人城至今叢祠遺基歸然尚在荆楚歲時鄉
人祀焉仰其高風慨然為賦其詞曰循漢臯而西望兮
何層城之孤峙披南烈之遺堞兮號夫人之故壘譙門
堙而中塞兮灌木森其相倚勢鬱律以上出兮下坡陁
而榛圯渺遺烈而未泯眷高芬而可紀昔典午之鼠首

屬苻丕之虎視區區保乎江漢峴一障乎北鄙寇方甚
于餓喙地幾同于黑子惟韓媼之慈訓勵朱公之朴忠
仗天節以扞敵據江城而臨戎于時大羽若日高旌如
虹桀黠同侮跳梁四攻防地中之甕缶舞樓上之梯衝
伊君母之慷慨兮誓喪元而靡悔臨大難而克壯兮懼
危闔之先潰率民婦而操築培戰陣而相對備之于條
候之西北兮宣神機之我味果前陷于厥角率圖全于
覆篲嗟女子之綿薄兮蓋中壺而是修奉蘋蘩之常祀

承巾櫛之餘休矧伏節而死難非君子而可求偉此母
之挺操亘終古而弗媮趙指括以全宗王勉陵而事劉
孟三徙以漸訓介俱隱以無尤雖先建于高躅兮我無
忝于前猷若乃寶壙百尋犀兵萬旅推轂受命建牙作
輔氣可蓋世威能拉虎或啗利而忘義或飽飛而背主
輸天險于敵國忍吾君之外侮悲丈夫之竊號曾緯縶
而無取儻死者之可作兮非夫人而誰與詠明德而不
已聊盤桓以延竚

嘯臺賦

梁城南下陳留右鄆環道卻走繩阡直指控鄭邑之遺
墟得阮公之故里抗孤臺兮數仞撫頽垣兮百雉木萼
萼兮冠巔棘棧棧而蔽趾息予駕于層阿披微徑而周
視坡陀隱軫沿緣徙倚徙倚兮奈何懷人兮孔多昔當
塗之失馭感羣俊之同波予生不辰道方薦瘥呂鴻軒
而被戈嵇鳳舉而嬰羅惟正德之思免潛蓀光以內照
狹世路之多辟兆天衢而觀妙悟跨俗以遺累喜憑高

而臨峭于是戾止斯臺恟恍徘徊叩神谷以抽緒憑驚
嘯而舒哀其始也創韻乎一氣其徐也淪響于九垓吟
將斷兮復尋意彌往而逾來志念君而宮轉心感物而
羽推激清飆于萬竅納素氣于元胎精感飛潛氣周動
植天籟停響龍吟輟息獸將騁而挂喙禽當飛而墜翼
寧蓄久而必愬將愬之而未極悲乎萬化弗停遺基欲
傾桑冒田而非海蕪隱壁而疑城轍雖窮兮罷哭酒徒
美兮非醒邑何知乎南巷土奚樂于東平但見豺獮狐

語臬翔虺驚雉驚鷺而輩作鴈雛雛而孤鳴覽陳迹以
遐悼莫髣髴乎遺聲已矣哉儻九原之不作信賢子之
成名

瑞麥圖賦

天聖之六載也陪京近地宛丘與封厥有瑞麥飛驛聞
上是時邦英臺彥鴻儒碩生被歡誦以香臻樂千齡之
希遇歟臣不敏敢揚言而賦之曰何聖辰之有感兮見
造物之流形伊嘉生之育粹兮亦稱珍而效靈蓋茂昭

于豐兆故絕出于祥經是月也候司燠怒節紀朱明司
徒謹土宜之法遂人勤時政之程畎畝鱗接田疇砥平
非滅裂之攸縱竟疏邀兮資生青青交秀芄芃向榮或
散穎兮共幹或連岐而並莖顧我疆兮我理悉如坻兮
如京民相勸而動色士覩奇而震驚俄具載于繪事兮
亟傳聞于禁庭寔惟天之輔德彰有言而順成若夫冀
草標祥朱英薦異茅三脊以儲祉芝九莖而表瑞信徒
假于書稱亦烏足以擬議請言瑞麥之可嘉也協氣交

生大鈞封植表天祐之孔昭顯坤珍之有葩宛彼神區
契茲景則嘉種肇靈秀稱數色浸潤兮芳澤之和鼓動
兮薰風之力餘糧雲委滯穗山積故陳陳而相因亦穰
穰而叵測宜乎允膺帝賚紹隆皇極豐功大業日躋兮
著明溢美連休月書兮不息顧葦陋之微才曷揄揚于
盛德

感雞賦

有序

予寓居畿邑有里中男子蔣福者多畜羣雞內一雞三

足其一足拳而弗用一雞獨足能飲啄嬉戲與羣雞上
下噫祥眚之事予不得而推但感其物理之異而為賦
云伊元化之無私兮播羣形以平施紛肖象而寓質若
巧鈞之制器鱗者俾夫沉泳兮角弗施于猛鷲引羽族
而普觀兮足惟兩而已備苟損益于天分兮匪生生之
本意何此匹鷄理絕常區或蹠蹠而獨止或疣贅而聯
跖並鳴翔于樊次亦飲啄乎庭隅徒觀其一則綴不用
之爪賸無名之膚象非同于海鱉名有忝于陽鳥其一

則踐孤立之危靡全形之德追山變以同號希商羊而
並翼寧真宰之好異兮伊微禽之我惑感天分之有常
循生涯而各得不決拇而斲枝詎日黔而浴白螭百足
而蛇憐蚓無心而土食將減此而益彼懼速尤而長惡
姑美惡之兩忘兮庶元和之來宅

德車載旌賦

案此為永樂大典所佚今據
宋文鑑及文翰類選增入

君有至德時乘大車當偃革以無外乃結旌而有初奉
駕陳儀采物雖資于備設鳴驚示禮拚旒匪俟于垂舒

順攷前經鋪聞往說謂戎事以既息貴君車之有結雍
容撫軾蓋藏飾以尚純肅穆展鈴詎垂旒而就列蓋由
抑乃盛飾昭夫令名雖冠品于輿服蔑揚威于旆旌肅
軫無譁方歛藏于旂厲馳輪有度靡赫奕于綏纓且夫
禮有質文器隨用捨車號乎德則崇化于邦本旌結其
表則示仁于天下意自象見名非人假君軒弭節孰訝
乎卷而懷之國乘制容益顯乎素為貴者是知車之用
兮充德以成大旌之飾兮輔威而孔昭既武怒之不作

信軍容而外銷組轡啟行陋郊旄之子子錯衡遵路殊
風旆之搖搖若然則動有彛儀文無異色雖嚴駕以備
物終去華而表德故使禮典攸重民瞻不忒皇皇整御
始中括于采章檻檻肅容豈外揚于藻飾用能上載明
德旁昭緡儀自駕言而戾止殊幅裂以藏之升降惟寅
僅比非心之屋章明盡屏寧同止獵之綏大矣哉邦禮
是崇帝儀資始實務德以垂教必收旌而昭理宜乎國
容備而兵器銷率由茲而盡美

元憲集卷一

欽定四庫全書

元憲集卷二

宋 宋庠 撰

五言古詩

正月望夕供養大阿羅漢畫像作

端月戒熙陽望舒秀圓極洗心乘佳節瞻像洗慈德穆
穆屋漏尊虛堂與神寂繪境紛自竒法性非所得人貌
含天虛髣髴若真觀示現隨三界精感超六識華燈列

清場寶炷熏梵席妙意隨春融疑懷逐冰釋欲讚已忘
言拳拳自終夕

嘯臺

孤壁橫天畿巋然衰尋丈恭承晉高士嘗此據遐想臨
風挹勝軌意若無今曩當塗昔戰龍典午方構象忠賢
履危運鱗羽嬰密網烈烈熾邦刑耿耿翦人望嵇呂膏
磔斧濤舒受羈鞅先生機且神妙用包羣枉兀爾謝將
迎隕然寄昏放禮法雖我讐智恬非外獎惻愴廣武游

留連步兵釀竭來桑梓國憑高念長往舒嘯萬籟先浮

精九皇上歸禽宛頸還秣駟臨芻仰當日天地心寥寥

共悲壯咄嗟涉千祀隱軫存遺壤臨岸知是非俎豆猶

彷彿

邑東故祠在焉

我來一傾耳城隅斷餘響梟鷄愁空林孤

狸語平莽高韻邈已徂清銘復誰賞

唐人獨孤及為嘯臺碑銘近年邑人

浚池得之

嘗聞史氏傳塗窮輒怙悵正人與直轡何代非流

蕩淳風日已微投辭謝精爽

入謁馬上作

殘月鑿鼓喧中衢
憶輪驚九關
忽洞開萬蓋
黝雲布燭
亂建章星塵迷華陰
霧車幅避鳴騶
鑾音聽朝御
嗟予亦何為
蓬此珍羣羽
野鶴載軒愁
狂狙裹衣怒
肅穆未央朝
蹢躅壽陵步
人生固有志
躁靜各成趣
生當伏農畎
乃爾汙賢路
峨升東蓬顛
吞腥滿飢嗟
樂育過阿陵
增裨乏塵露
徒懷一割志
但恐流芳暮
且復埃途巡
南山有場圃

習彥威

四海習彥威英英出江漢高韻凌風翔雕文奪星爛感
激陽秋辭姦雄非所憚蜀弱自為正曹強乃名亂陰忤
柄臣意飄然去恩館驅車自北門四顧興長歎終焉謝
病免猶得為人半緬矣身後名臨風寄悽惋

有邑子夜宿話余先疇燕廢

臨邛久倦客彭澤賦歸來念我何為者趣時良殆哉一
身仕東觀三載寄靈臺望見故鄉樹頻更緹筦灰曉車
愁蹇蹇春招負莓莓虛名自韁鎖豐壤成汙萊日想社

粉老心知門柳摧神阡迷馬鬣栢表被狸災一聞里人
語夜靜成多懷他日還燕泣前憂成誤哀

留別知郡職方楊員外

予本草茅士世無鍾鼎榮在昔未勝冠先疇弓冶傾茹
荼濱十死屬續存微生分遂甯牛飯誰希莊鴈鳴龍具
泣妻子練裙悲弟兄慈誨斷軻織遺書開晏楹感激侏
儒飽呻吟裘氏聲下武纂丕構協風翔四瀛紛馳賁丘
帛高監當衢旌鸞翮不暇戢驥材方自呈車徒首燕路

冠蓋溢秦京文章趙元叔
辱舌婁君卿列邸曳裙入羣

公交幣迎僕嘗不自料奮迹希時英
弟子許都養詞人

咄老傖一旦褐衣召千慙
昆玉名安知軼蛙賤但覺軒

鴻輕初命六百石

漢廷尉平
六百石

關掌列侯城居然懜操決

無術裨澄清天災屢來集
冤獄紛以盈

僕莅局以來水
旱為沴者各再

姦吏受
賕者一

誚讓使臺檄流離民屋征結課
諒無最黜幽茲

有萌晚邁金閨彥傳瑞提千兵
為僚篤古義賞善多新
評坐則席函丈出則車連衡
高論天人際細畧米鹽爭

愚慮或窺管嘉言茲報瓊賞音非易遇曠古難為并嚴
惠不世出蕭朱猶害成何言末路日獨契後凋情累洽
帝圖盛思皇賢路平願言寄君子始終同所營

獻臣學士與余通書因成感詠

夫君班揚儔抱槩羣玉府久讀未見書躬抽繫年譜墜
緒獲先秦亡篇出東魯上泝三皇墳旁探百家語怪牒
汲郡來幽經茂陵聚英哲資繕藏緹油盡刊補蒸青勁
竹殘削誤規刀苦種別踰九流星羅軼千部顧我寡見

聞蒙薰異倫伍祕帙樂共披謠文許交舉家攄互紛綸
郵笥劇旁午初無班嗣嗤更免許慈拒矧余羈官久寂
寔繫茅宇禮乏贈酒甌疑增照觴怒尚賴啓新編時時
發聲瞽

予自到嶺外居嵐瘴中未嘗不以先死對治人人
見其浩然若有所得者今歲在海外遇寒食因發
家書想望松楸不能自理偶成此詩示兒子

春日自明霽我心何鬱傷草木競芬菲飛鳴自頽頽悄

悄坐書幌幽幽宴空牀既無功名念反翻音思白晝長愁

來不自持零落鴻鴈行三過解澤流六見槐柳黃最憐
小兒女路遠不得將生還一笑喜死去埋他鄉生死如
循環我師佛老莊感此寒食節新烟過鄰牆松楸渺雲
海目極摧肝腸書成附鱗翼不如永相忘何以慰目前

作詩示阿張

阿張孟
堅小字

左散騎常侍東海徐公

徐公真丈夫不獨文章伯江南兵未解主憂臣慘戚公

願紓其難苦求使上國庶獲一言伸少息苞茅責其君
驚且歎執手涕沾臆謂言知爾晚何此忠義激天子叱
在殿誚讓雷霆赫公亦從容對曾不渝神色仁者必有
勇斯亦古遺直書大畧其小我有春秋癖所以此詩中
不言公翰墨庶警事君心勉旃希令德

夏日晚出芙蓉堂

哲匠昔締構

故相文惠
陳公所建

文楹面清池回環水光合左右

雲容披蒼烟限壘斷空碧盈軒垂蕙綠不待染荷圓皆

中規戲魚觸新藻幽鷺翹空坻初筍半遺籜殘跗猶抱
枝我來冰未泮倏此亘炎曦節物一以換余懷焉獨怡
內慚固陋質本乏廊廟姿印綬紛璀璨旌旄森陸離林
狙裹華黻野鹿駭金羈負山力已竭傾日心空疲如此
危殆辱斯言非我欺橫琴不成調慷慨念歸期

秋晚禁廬獨坐

霜日薄西牖境寂趣自閒風篁宿天籟海碧沈雲山宮
樹未全落棲鳥相與還心疑蹈虛宇跡乃塵清班自顧

邱壑志何施軒冕顏終當謝緋服戢翼榆枋間

孔明

漢家亂無象賢才戢鱗翼武侯霸王器隆中事耕殖堂
堂劉豫州介紹徐元直一聞臥龍譽三駕荒廬側士為
知已用陳辭薄霄極說吳若轉丸抗魏猶卷席談笑馭
關張從容羈梁益持邦二紀餘君臣絕纖隙浮埃蔽穹
壤大節淪金石梁甫不復聞懷賢涕霑臆

筠亭

金史卷一百一十五
卷二
歲晚檀欒姿山中映孤宇聲繁天籟吟影動仙幢舞即
境是真如黃花間幽圃

嘗假馬于親舊不獲因感而成詠

東方昔借車尼父嘗假蓋一馬茲不全夷涂出如閩人
無托乘寵朝罕均茵載策足本乏謀臨風嗟有待京洛
富華廐權奇出青海翩翩陌上郎滅沒爭星邁珂音雜
鸞響羈勢動霞綵東郭獨何為徒行屢將敗

穀城主簿王崇者少得養生禪寂之道中年棄官

入漢陰武當之間邈與世絕又有吳人山者自遠
攜母與王同隱時余方貧病慨然慕之因為詩代
書以寄二子且托王尋耕釣之地相與過者竝以
叙懷云

余本邱壑人失計蹈塵網軒冕忽韁鎖風波若流蕩高
羽顛宏羅奔駢債歸鞅衆僞緣境滋千憂共身長進乏
汗馬勞居畏濡鵜賞力命頻遘迤幽憂思獨往聞君集
漢陰遁世久忘象因溜為鳴琴憑巖作煙幌復有延陵

季亦善南越養築宇近親仁耕田或歌壤且言掛瓢處
一徑捫蘿上杳若御風遊蕭蕭骨毛爽芝朮紛異苗磨
臙結幽響老木森千尋丹藤垂百丈洞谷答嘯歌雲霞
代隣黨咨予倦遊者緬邈期真賞之子幸我憐試煩翦
幽莽儻獲蝸牛居即謝海禽餐時從漁父魚聊植仙人
杖漸脫區中緣永託無生獎

和答李學士見寄長韻

璇源多清派蘭谷無絕芳之子相門裔高才映周行妙

年弄文史雅志含圭璋中歲困官簿銖兩爭低昂一通
金閨籍荏苒滿鬢霜剖符屢麾阮執戟更疲揚聞君近
多暇歸偃三經堂左右褫紳組縱橫羅巾箱安驅仁義
塗弭節名聲揚戰酣道始勝心泰無癯彫壯思挾飛藻詔
我臨霞章我時坐鈴閣寂寞如禪房開緘一快讀雋味
腴且長高義溢句流清風隨篇翔感人不無意在水河
湯湯吾匪辯音者空冀懷仁藏矧屬歲躔暮百卉皆芒
黃何以謝君子松柏同蒼蒼

和答吳充學士見寄長韻

多士秀王國珍羣驚天衢其間延陵季煜煜承華跗盛
藻班蔡流芳年終賈徒籤芸擁石室札綈紛鴻都刊偽
富清暇壯思彌天隅投我塵外什粲然風義俱幽襟恣
申詠不覺頽陽烏渴叻漱仙液饑腸涵道腴衰翁牽風
尚騷雅嘗馳驅疲足道雖頓流波心未渝過門輒大嚼
臨博猶狂呼詎云獲真賞聊復愜所娛矧繫絕唱贈無
脛來明珠報之乏瓊玖寶玩徒區區

歲晚許昌城隅登樓作

孤城何巘岼西北有層構我來一長眺正迫歲陰候嚴
風挫萬物霜雪復交寇冬日苦易頽義車劇馳驟宵月
不相讓空弦映矢彀潦收陂面闊木落山骨瘦生平邱
壑心顧慕獨延脰箕峰紫氛結潁瀨瓊波漱想像逃名
夫幽居翳仙竇願言追遐蹤人間謝譏詬

天禧初僑寓安陸有宅一區嘗于齋前手植橘樹
纔尺餘許未幾擢第隨牒遊方天聖庚午冬屏居

幾邑守舍兒自安陸饋余丹橘一篋因曰此即齋
前所植撫物懷舊悽然不平者久之因成感詠

昔年封藥栽生意頗柔脆今茲見丹實落落如星麗斯

果號難成常踰豫章歲

比本不十年不實

孤根何為者尚記吾

廬地蔽芾詎因崇連蜷乃同桂厥包千里遙守舍重緹

惠金顆照病眸霜津益瘠肺欲算去里年十聽秋鴻唳

無復陸績懷寧圖李衡計他時攀樹悲詎減金城涕

歲晏出沐感事內訟一首

山海有完士希世無良籌偶穿東郭履遂別野人舟不
恥篆刻賦來肩英俊游私智甚鳧短塵容若鷗愁備員

太史氏補屬富民侯

梁漢書田千秋封富民侯唐人避
太宗諱改民為人此詩原本作富

人今
改正

姑學了官事何嘗分主憂日貪斗食利歲感星躔

周中都富才彥方駕若龍蚪茂先喜史漢平津治春秋
高文用司馬格五寵虞邱間閣路逢葛繡紛人召鄒桑
羊興賈豎安國出縲囚汲鄭貴交盛徐陳英藻道況乃
天下樞雄雌來九州衣冠徑複道鼓吹出長楸席上萬

錢箸橋邊八列騶雍容緩魯袂意氣拂吳鉤咨予良不
韙瓴甕厠珠璆吹竽昔已濫在梁今可尤臺閣魏舒被
風雪蕪李裘有志謝軒鶴無機防海鷗擬竣杜陵課誅
茅歸故疇

送上元勾簿吳昌卿

長安鼙鼓喧里舍隙塵曉有客駐歌驪歸途指江徼晨
庖爨蕪冷窮巷鄉輿少乃肯顧我廬歡言復悲嘯悲嘯
誠易知夫君韻經竒才高洛陽賈賦動楚湘累平昔應

賢詔覽德揚英蕤孚尹傾寶肆沛艾絡仙羈獻書北闕
下對策東堂垂逢吉旦兼暮諧音塤且箎天官選初筮黃
綬聊藏器三釜樂及親尺檄甘為吏邇來預冬集再調
鬱奇意羣公亟為言力命乃相戾奏牘輒報聞官書責
勤蒞簿領百里佐風煙六朝地銷魂南浦行挂頗西山
氣君子永來譽勝襟無累欵行矣勿載譁鄉枌方省家
春橈碎溪月曉颿弄江霞長洲紛藉草故樹雜生花予
心若為處歲晏杳疏麻

京師故僚以余退居近畿數賜存問因叙懷自感
病餘頗厭肉欣得僧廬蔬僧牕亦明潔可以觀我書弟
兄冷相對因著柏酒醉醺餘欲拈筆狀乃爾狼狽我老
固有素未至形茶具其事故可知寧復論年數阿連吾
語汝我計當何取學道既無成何如事農圃

冬至攝事南郊齋官感懷作

履至謹冬祀攝職叨上公洗心奉明誠祇宿城南宮芳歲
正道莫熙陽殊未融西郊淡頽景北牖來朔風驚野騁

歸獸緣雲號征鴻夕坐無晤言情條結深衷自撫韋布
陋奚堪廊廟崇觀瞻動衆目跼蹐愁我躬自古經緯才
因勢猶汙隆夔高值虞奮孔墨遭周窮如何一介士蔑
著橫草功仰被天宇施遂際人爵豐較能劣涓壚荷寵
踰華嵩物理自非是神鑒安可蒙區區謝病志終冀回

天聰

時已三上
表乞退

念衰二首

勁風吹北林落葉舞南牖歲序忽已高崢嶸薄星斗大

化驅羣物始終迭相授義和亦何為挾日但西走少壯
馳目前衰頰躡人後星星兩霜鬢伴我老成醜學道苦
嗟晚捫心更餘咎茲意將奈何投身就杯酒

衰容鑒青銅寒光了無隱照我顛上毛星星罕餘鬢持
此將奈何歲月屢邁盡少壯罕聞道下士乃為哂操綆
遽汲深持矛復夸楫任重力疾顛塗窮計方窘上孤明
主恩下違昔賢準憂悔從中來老至非無朕尚忝麾守
尊居慚政條敏孤心企寒柏萬境付朝菌往失奚足追

來戒或堪引明發邱壑情予將治歸軫

湖山

空水渺澄鮮蒼山復盤踞沙草媚苔磯雲柯抱巖樹畸
人茲與留脫世如遺屨

登大明寺塔

故歲搖落時憑高望揚越流光不我與復此值凋節孤
塔踞層岡仙盤湧寥沔病足攀危梯寸晷或三歇浩蕩
佛界寬凌兢客心折遠岫幾培塿空江一明滅海日棲

簷題霜風語鈴舌荒墟自今古大塊靡封埒豁若醯覆
開醒如豆聰撒哀哉人間世小智互紛結承螽論是非
蠶蝸定雄傑俵俵百代俗唧唧九流說進致無窮中秋
毫共飄瞥聖人小天下樂意遺來哲矧余蒙鄙姿輕蹈
榮利輟溷濁六塵并謹歎太和泄薄言真境游追悟生
理缺洗心刻來誓同步懲曩跌甘露多餘滋聖闕有幽
鐫咄嗟朝市人此路非爾躡

哭公實學士

高子北方士才為國之華靈襟絕塵藻麗藻紛春葩雖
云服韁鎖高意籠青霞子昔久蒙潤逢辰亨乃嘉聯飛
奉臺閣相顧引龜綢鮑叔不予怯楚臣寧汝瑕詔書頻
出沐歸轡屢回車時過蔣生徑或詣子雲家柏將松竝
悅人與室非遐自謂百年分風期何所嗟君命良不淑
浮生茲有涯沈疴犯霜露幽讖發龍蛇美志一朝盡餘
哀千古賒招魂知是否生肘詎真耶塗斤失郢匠膝席
天長沙青黃飾溝木蒲褥墜風花世事一以謬何言定

隆宋都門執謳紉原路引哀笳夕雲旌外慘春日塚頭
斜自此掩瑤軫其誰知伯牙

壬子歲四月甲申夜紀夢

積雨暗長夜山行經險巖悲風撼林木崖谷蔽參差遠
聞豺虎號鬼燐弄光輝十步九失足中心祇自持所適
既迢遞黽勉焉可為道旁見明燭抵宿依茅茨開戶念
生客喜逢主翁慈煖湯趣妻子然薪為更衣艱難又奚
怨少息非所期雞鳴夜將旦熟寐百無知欣戚一以忘

何有安與危生死宇宙內曠懷亦如斯聊紀夢中事誰當賡我詩

過曹氏墳庵在瀟皖間蜀僧修靜字天柱退居于此

出郭屏僕從取徑問樵牧短松新被岡青嶂遠遮屋雞犬無四鄰日月自兩轂阿師厭機緣脫迹謝塵俗是心大圓明一室了具足汲泉烹細芽支鐺炊脫粟默坐契從三諸方付藏六我來同友生得飽徑眠熟稍為微風

醒已難畏景促買山知幾時
所惜負松菊

水月

湖上纖羅收天邊夕蟾映皎潔
銀界寬虛明佛心定可
愛不可持乾坤共孤影

余臥病畿邑御史王君假守潭
楚道出于舍下特
見存訪且尋先子之舊飲承風
儀因為詩抒感云
病客臥窮里衡扉掩殘春
隳官道家藏竄跡農墾民朝
羅噪饑雀暮席流芳塵尸居
忼踰歲踵息動彌旬忽訝

絳韞隸傳呼越郊畛蹠躩千餘騎雍容兩朱輪言是楚
邦守來過安邑貧固宜辨貴棄乃爾存艱辛此道古為
重餘風今已淪物色認平素載言接慇懃始悟先子舊
早篤嘗僚親孤心極摧櫓感涕浩盈巾追念舞勺歲已

識棲鸞人

景德中余侍先子為弋陽督郵
君時勾指屬邑始授余以學術

師筵奉函席

學舍操書筠童牙自忘醜詩鉢或娛賓公時摘句賞謂
是天麒麟親擘彩牋贈勉我期日新

君嘗作詩賦
余多所獎勗

汝南

丐題品有道定人倫自爾一睽刺中年嬰世紛天聖紹

休緒頓網橫無垠驚鵠不藏翼蚪蝸無遁鱗余時溫隗
始驥首摩蒼旻司徒揖元叔天子第平津甲科廷尉屬
再命宮坊臣黃香入東觀賈誼過西秦紬繹金匱室珥
彤瑤水濱登瀛識褚馬頌漢希淵雲一朝泣風樹九死
存餘焄中都索米後老圃種瓜辰惠然下車揖高義傾
前聞卻計髭髦日二紀如逡巡今形雖隱几昔訓尚銘
紳丈人篤求舊媮俗將還淳湘水澹蒼野衡峯凌紫氛
澤節首南夏瑤魁瞻邃宸戀闕魏公子弔賢楚靈均公

懷佐時略宜樹光朝勛奚為遠問俗惜此徒傷神宣室
懋清問華光欽寶鄰行行愛玉體趨節竚來臻

去年三月禊飲池上歲月易得忽復暮春因再宴
僚屬作

前茲屬元巳置酒蒼烟臺芳序忽復周春風正徘徊懽
言速僚友亟使具觥盃長渠溢芳溜列坐浮香來靈囂
合衆樂隱若南山雷舞袂紛雜襲賓冠儼崔嵬美人前
為壽顏色如瓊瑰況我千萬日行樂無疑猜新歌裊天

衢興視行雲回我時語四座茲賞誠難哉妙顏無再朱
白髮惟相催跼蹐盈聖智孔顏罹憂摧區區百世後美
惡同塵灰吾欲挈瑤斗踞海為金罍挹茲忘憂物與爾
同嘲諧天地為一朝長短何足哀魯陽久不作白日任
西頽

奉詔止兩宿齋建隆觀

漢家候神館奉詔禳沈災解纓就齋幕恍若躋蓬萊雲
羅絳朝舄露掌承仙杯衆真拱象帝寶宇正崔嵬爐烟

薰太虛重陰為之開單枕不成寐俗魂自驚猜心迷坐
忘術萬慮無根來天雞殊未鳴霜鴈有餘哀借問麋鹿
姿云胡塵國台構極謝隆棟裨山劣纖埃上慚稷契名
下愧丙魏才惟餘止足戒臨路空徘徊

念古

賢哉邴曼容出處知所據官餘六百石輒自移疾去富
貴非不懷殆辱亦先慮嗟我材下中叨恩最蕃庶堯庭
納言職軒野方明御服袞作槐班曳履南宮署雖經斥

免銷尚玷高華處

昌據反

徒有守直弦何能借前箸愚甘

六馬對讒恨三物詛來年感衰疾倦鳥思返翥抗心望
先哲俯首慚昔譽西景尚可收歸轅未云遽儻以人望
人期君或吾恕

己巳歲除夜有感

明晦互推斥中都芳歲闌星迴迫舊次篇暖送餘寒來
辰繭有緒去境環無端天運故相易人心那獨安懷此
不能寐攬衣強盤桓踈恐緩餘帶危惕整塵冠耿耿燭

焰直淒淒霜氣酸城頭殞高木庭下敗叢蘭撫臆累新
欬掩觴沈故懽況乃蹈世網虛名爭控搏挾冊濫書府
振纓玷王官東序羅圭瑞西雍集鵷鸞昏眩竇肆短
翼厠仙翰縱爾值藏疾何容久素餐泛泛騷客鳬坎坎
詩人檀寧無要路津所畏在蹢躅枳棘附驥尾緯蕭戲
龍蟠寄語拙艱者無俟學邯鄲

王粲

秦川貴公子避地來荊州流離世道喪簡脫天姿邁歲

時不我與假日賦銷憂妍辭縟非霧逸韻鏘鳴球曹師
下南服置酒臨滄洲慷慨前為壽高譚王霸籌歸來奉
丞相攝組登華輶獨步今已矣空餘清漢流

漢將三首

漢家開絕域日夕羽書聞朝那殺都尉北地敗將軍沙
明疑畫雪氣黑似秋雲片月就城偃長蛇隨陣分水藏
馬窟路血沫翎星文直置鴻毛命聊圖麟閣勲

頻年隨校尉晚節事輕車膽烽數奔命辭第詎為家輕

齋絕瀚海間道襲昆邪雙鞬朝負羽三鑿夜鳴茄金瘡
先雨覺蓬鬢後霜華如何差六級遽使抱長嗟

薄伐乃中謀和親非上策匈奴負漢恩男兒喜邊檄故
歲出定襄今年救張掖沙平落日黃月迥遙峯白急擊
右地兵連俘月支馘幕府省文書家人非尺籍夜拔五
嶺旗晨追六驃迹陛下焚謗書孤臣勒燕石

雨夜秋興示仲氏子京

秋律盪華序濃雲生夕陰羣芳伴雨泣百竅隨風吟哀

螢滅遙徑倦翼翔故林暗隙濕已逗孤燈青欲沈愁人
此遙夜萬慮集幽衿歡緒未盈尺憂端已越尋借問所
以然出處謬素心家世本邱壑才具非瓊琳靈根夙已
殞野服良所欽寧芝幽澗畔擲鰲故溪潯爾濫官牒
今焉旅華簪兄弟見羈勒交朋賴幽箴爾講壤壁簡我
攀羣玉岑嚴枚交逸藻潘陸嗣清音羣才方構厦短綆
徒汲深狂迷頓纓鹿踉蹌乘軒禽歸來翳編翟況乃貫
愁霖求新動踰桂鬻賦靡酬金原病固為累胡飢非所

任猶欣共姜被歲晏樂惜惜

寄題職方周員外廬山笑臺

員外九江人嘗游憩于廬山之陽自謂太

平之民樂道逢聖造適輒笑因以名臺後為二千石過故里鄉人葺其臺且旌賢者之致

周郎有舊隱遠在南山陞一笑偶為樂九層遂成基旁

連醉令石卻眺社僧碑

謝康樂所撰述公碑今在廬阜

地遠雲物秀巖

深松桂滋當時驚高興益友相攀追樂聖自鼓腹談經

亦軒眉風猿助清嘯谷鳥參朋嬉忽引朝闈籍久垂林

下期頭白二千石高蓋復來思活活弄新溜蒼蒼援故

枝雖云未投紱良足紓煩疲余懷本邱壑世路方羈羈
願言獨往客緬邈心空馳稅駕或未晚從君歌紫芝

歲暮北亭懷子京宛邱二首

歲晏坐孤壁心馳千里餘何言共被樂方歎專城居野
閣江海漫風高天地虛願言逐歸鳥無翼將焉如

搖落江都城風塵宛邱道天涯遙相望離思何草草迴
澤騰麇麇滄洲叫鳬鵠星歲日云徂在原歎方浩

游山簡習池

昔日白接羅時時詣諸習累榭今已頽清池尚堪挹遙

源乳竇響

其源出鳳山白馬寺泉聲咽絕可愛

敗防流沙急況復蘭蕙時

幽香遠相襲

魚梁

亦曰槎頭在岷津上水落時洲人構竹木爲梁絕流以捕魚

八月霜潦收江槎絕烟渚竹落如網裁淵鱗劇雲聚驚
鳥爭食飛兒童荷叉語去乙鰈項肥吳羹免轅釜

七言古詩

正月望夜聞影燈之盛齋中孤坐因寫所懷

漢家太一昏祠日寶炬神燈徧京室仁壽先從殿裏開
纖阿正傍樓前出傳聞陌上樂康年寶騎如龍人若仙
驂驪始見斗城曲爛熳還逢星漢邊妍歌巧笑競賡續
萬狀晶熒奪人目洛橋羅襪自生塵楚國香纓不藏燭
五侯四姓共豪華況乃經過趙李家迷路非關武陵水
添妝祇為壽陽花九門啓鑰光如畫若箇游人不同首
春宵病客獨無悰挾冊焚香坐虛牖坐久更闌可奈何
著書自古窮愁多鍾磬笙竽盡鄰里誰能載酒來相過

吳侍郎生朝

朝端舊記生賢日使節臨門恩有秩詔書感會形溫辭
宴品豐華動私室降崧孕昴誠不誣史簡詩絃互褒述
賢人挹道隨汙隆忽向西臺就安逸門弧紀旦還復周
瑞霰連天芳歲道塤音箎曲會中坐蘭叢玉樹來西州
稱觴獻壽私庭裏別得人生行樂意貳官禮樂春闈卿
托蹟逍遙漆園吏病尹論交情最深因聲附祝成孤吟
願將明哲保身智遺我摧頽知止心

玉宸殿竝三枝牡丹歌

中天帝圃蓄英蕤氤氲嘉祥凝朝曦竹間芳種易封殖
疊萼三葩同茂枝慶雲景宿共靈意鴻英託寓茲為美
華夷面內始竝柯慈孝歡心遂聯藹雲旂羽葆駐天臨
玩此能無悅聖心幽香自逐德馨遠麗色更緣眉彩深
因生軼草兼平露薦祉神庭幸同侶盛開已被帝琴風
縱落猶成佛天雨

安福殿千葉雙頭竝枝白牡丹歌

三月春風滿瑤水珍叢瑞薄紛難紀
瞬息若茲花四照中
揚旌獨茂千齡祉
千齡丕應在重葩
雙吐瓊房彰協華
秀附即鏤平臺雪
寶豔寧爭台嶺霞
球欄黼幄遙相映
姑射仙姿玉虛境
結根已近堯冀階
借媚非關漢蓮井
天襟多豫玩羣芳
彼美幽姿首效祥
都緣剩沐太和潤
況自頻分私照光
憑休託粹成奇質
一卉時來遂逢吉
願將藥品誌佳名
永續芝房騰茂實

感花

前日來攀小園樹枝頭蓓蕾無萬數今朝置酒來賞花
已有殘英伴飛絮春花如此將奈何白日雖遲終不住
鶯歌蝶舞兩矜春見我長嗟亦飛去

元憲集卷二

欽定四庫全書

元憲集卷三

宋 宋庠 撰

五言律詩

南禪院

王舍多幽剎林居訪淨人
旁行經葉古寶色梵天春
風閣鈴如語烟溪樹勝輪
道場聊抖擻認得客衣塵

和楊學士和答中丞晏尚書西園玩菊

慄慄衆芳歇金英無與儔香疑飲潭日歡似漉巾秋潤
蘼霜華入薰叢野色留郢蘭休自咤冰玉此賡酬

晏乃
楊之

子
壻

春夕聞鴈

春夕坐神臯天長北鴈號來思繫書足去羨順風毛瑞
鵠天淵暖啼鳥禁樹高夫君自江海避弋莫為勞

馬上見梅花初發

瞥見江南樹繁英照晚牆無雙春外色第一臘前香雲

葉遶驚目瓊枝昔斷腸莫吹羌塢笛容易損孤芳

西陂

歲晏西陂好澄波共夕陽戲魚來有暈驚鷺去無行荇
葉疎猶碧蘭苕老更香裴回歸鞅晚併為似滄浪

新月

稍傍夕樓明娟娟底有情眉纖闕蛾出鉤曲誤魚驚欲
暗猶銜岫將斜更上楹刀頭君自晚莫枉桂初生

過璨師房

病客塵纓外幽齋法境中庭喧施鳥食坐拂去花風茗
溜沉甌綠檀烟入篆紅忘言一相對何處妄求空

送外門朱秀才見訪都下卻歸安陸舊隱

白髮游梁晚青山念楚歸魂銷雖得別戰勝卻成肥

秀才

忘懷進取年高道
勝有康寧之福

障日都門蓋迎烟磴路衣試尋南園

樹今長幾多圍

余昔僑居安陸小
園正在翁宅之南

次韻和吳侍郎謝王陝州寄酒

遙聞齋酎絮來佐客觴酣棠野歌新續兵廚興舊諧竹

供醅上色蘭獻液中甘欲識西臺勝厭厭夜雪菴

建隆寺北池亭

寶剎開初地滄浪繞故城
芰蓮俱野色鶻鵠各秋聲
岸澗烟無著牕虛日易明
歸驂誰訝久正為濯塵纓

前歲春僕與獻臣同餞常山公于苑西曾未再觴
已均師門之痛兼承卽日親奉攢塗追往悼今哽
涕無已因成短詩抒感諒心契之同戚也

昔歲西郊餞曾瞻出守麾
今年東第哭便歎昔人萎辰

已空成讖膏肓不遇醫詰朝聞袞歛心折寢門悲

贈兵部尚書魯肅簡公挽詞三首

應運推邦直乘時講化源不冠嘗可奏問樹本無言亮
節裨初載清風裕後昆忽嗟梁木壞裒冊賁忠魂

昔事重明邸俄陶萬物鈞專懷長孺直終損武侯神舟
壑先成夜桃蹊遂不春惟餘麗牲刻終古誌名臣

偉望巖巖峻忠言諤諤昌門無謝恩客惟有獻書囊王
駿封侯晚臧孫樹德長都門簫鼓發行路泣云亡

送黃昱赴太平州理掾

閩錄家聲茂唐銓吏格平新資掾三語舊榜佛千名月
苦鄉魂極春寒酒意輕高材難偶俗慎勿對參卿

送北部馬員外二湖提點荆獄

西漢為郎選南方奉使才書隨星火落帆拂斗牛開束
筭聞民悅丹毫絕吏猜柰矜持節重無客對銜杯

秋日小雨後作

晚陌收殘雨高軒冒夕霏風乾移舊響月破影空圓敗

葉相將舞寒雲不肯飛與無潘掾筆

潘岳以太尉掾寓直散騎省作秋興

賦

何衍寫心微

送英州理掾朱勇

遠補參鄉掾來過乞墅錫秋悲先鴈引曉涕伴參橫惹
子期竭疾梅花幸寄聲片言無異俗陰德在鄉閭

送從兄祕校咸赴衢州都掾

倦客睢園遠迎家越絕長聊甘都罰掾羞比入貲郎汗
竹書滕密炊菰宴具香蘭臺英藻盛方信乃宗彊

送宗弟秘校士赴建州理掾

補吏唐資淺遊方漢牒遙貪榮親及祿詎悔俊沉僚萬
詠同根底松期晚歲凋曾孫柔俗美前識詒簞銷

相州春日

北土無繁卉空亭有暝陰狂飛憎野絮多舌恨春禽地
燥山如朽池寒水不深生平箕穎志軒冕獨何心

送太常王素博士許昌通理

連佐陪京郡愁銜出祖杯新曹拋野蕪舊第老公槐

大君

父太師常為先太尉文正公手植

三槐于庭以期遠至事具家傳

府檄迎車遠戎牙宴

豆開遙知傾坐日方歎阿鄜才

許昌府公太師未識君今度為之佐

秋夜禁直聞雨

微道千廬地宵霖八月天牀棲吳簟竹牕濕漢宮錢幕
影翻層浪簷聲響細泉空堦何所得併是廢愁眠

臨春水

盡日臨春水非關問要津舟行魚避檝岸坐草留人杏

萼千紅糝苔花小翠鱗已堪遺俗慮何必獨江濱

獨于江

見莊
子

東方欲曉

鳥渴催宵漏雞鳴引曙光
山西河關淡天北斗低昂銀
燭香猶盡瑤琴冷未張
何須開寶鑑容鬢定蒼蒼

掖門待漏

曉陌千槐落嚴扉萬蓋留浮雲低觀闕殘漏急章溝
斗柄遙臨殿參旗側映樓如何軒上鷗獨憶海天秋

和吳侍郎題寶應僧房白雞冠花

野卉秀禪庭瑤華發素英託根真不染肖質似先鳴露
葉疑藏羽烟粧更作纓何妨依忍草休辨好丹名

秋蝶

百卉芳心罷空園蝶影微雖逢已涼節尚作有情飛露
菊聊堪採風蘭或可依履霜從此懼君意定何歸

登大明寺塔

寂寞南朝寺徘徊北顧人鐘聲含曉籟塔相湧仙輪弔
古千齡恨觀空萬法塵三車何處在歸鞅欲迷津

燈夕齋中杳火獨坐招希元不至

掩室維摩病從昏太一祠誰言鼓吹夕獨禮天人師燭
燼委寒紫茗華浮縹瓷同袍不我顧晏坐復何思

送刁繹從事自龍舒西赴青城宰

東別羣舒國西踰二劔天才高鄴都檄政竚武城絃
作馬征蹄苦巖鷄瑞羽鮮離愁知遠近萬里到橋邊

疾風

天陸箕躔動林簫萬籟空扶搖莊海北悲眩魯門東貪

誠詩人隧清思賦客雄何因知勁草霜陌盡飛蓬

朝謁建隆寺

郡國高皇廟天龍釋帝居兵銷擒布後臺聳畏軒餘寶

揚成蓮坐

其寺中有
當時御榻

戎韜入貝書守臣榮就望屏息拜

前除

遲明出都謝雪龍門佛祠途中復遇雪

路澗三條陌雲低九鼎門鏡風催騎響裘霰減貂溫谷

曉天花亂林空苑絮繁周楚農意切一一願流根

晚歸馳道遇雨馬上作

朝雨雜輕靈濃陰暮未開天低五里霧日晦九成臺
宮溜輕涼玉坊車小隱雷不愁馳道遠寶色夾千槐

河陽寒食

開輔陪京外年華禁火中柳矜河上綠花獻酒邊紅
野市鞦韆月春樓窸窣風三州六鑽燧安得不衰翁

晚晴

斜日紅初斂晴山翠欲流休歌陌婦怨寧作賈胡留
物

意如相樂吾生有底愁早分好風月更上庾公樓

贈中書令沂國王文正公挽詞二首

揆路同寅業師垣出守麾終無三令喜便集兩楹悲袞
職嗟何補天心感慙遺幽泉空漏漉非復作霖時
自昔榮歸袞今茲駭閱川天愁摧柱日星痛殞箕年素
履遺儒範忠謀溢吏篇空餘洧鄉陌長似峴碑前

錢侯東齋

北里開公第東齋集俊游祕書家有副甲令世傳侯鳳

竹供聯冊鯖盤入宴羞門前多鷓鴣蓋不爲騁長楸

贈附馬都尉李和文公挽詞二首

曲里猶龍族西京尚主侯勲華傳舊鉞名理寄虛舟得
疾真無妄觀生遂若休偏嗟荀令沼回作逝川流

北第琴樽歇東原旌旆飛清風邈無所此路是長違野
闊車吞響天愁日抱輝空餘門下客魚鳥歎何依

獨坐郡圃北齋

宿雨催秋物清風卷歲華殘蛸初去柳寒蝶尚尋花密

篠留蒼霧紅衣染落霞城頭八九子日昃亂啼鴉

贈太子太保晁文公挽詞二首

帝禁留辭範儒林老棟材方期割牲禮遽近奠楹灾歲
晏巢鵲逝天秋吊鶴來宗工銘盛德千古照泉臺

几杖辭榮久龍蛇感歲遷留春太史記成佛謝公緣素
蓋寒雲外哀簫落月前無煩樵牧禁行路拜新阡

贈司徒兼侍中宋宣獻挽詞

案宣獻宋綬謚庠與綬同姓不宗見于景

文筆記故

桐不去姓

一世文為伯三階象有光何言隆棟吉忽歎夜舟藏
禮朝頒冊哀音路過喪善人今不與神理太茫茫

梁木萎邦哲秉輿哭第家斂恩周袞里追品漢貂華素
禮初無悔浮生遂有涯斯文從此喪誰與辨咬哇
舛運明生疾忠懷語絕偷空榮人曳履終隔相封侯太
史藏書法門生助紼謳惟餘文獻謚不復嘆平頭

宗工天下寶歸葬國西原野闊簫聲苦雲愁旖影昏如
存三事禮不返九京魂河海空成淚難酬國士恩

別墅冬霽

宅隱羊曇墅門連仲蔚蒿銜孟思左蟹舒嘯憶東臯楚
桂風生穴莊魚浪溢濠平生邱壑志終願寄民曹

冬霽

夜枕鴻違漢霜天雀噪園回車長者轍曝背野人暄墨
溜沈寒沼松醪湛凍樽誰能穿雪履待詔魯班門

贈太傅中書令張文節公挽詞三首

素範流邦冊昌言溢帝聰三台應天老萬事問胡公道

有如絃直生嗟委蛻窮令君煎上傳袞歛賁遺忠

昔命光三事今嗟贖百身堂無纖蒲妾車有吐茵人台
圻層氛夜槐凋故府春空餘相國第不與勢家鄰

平日開黃閣茲辰奠素旗留侯嘗辟穀巖說遂騎箕天
迴哀笳咽林長導筓遲行人此墮淚何必岷亭碑

次韻和吳侍郎再葺東亭兼懷晁公舊隱

地占新齋舊天扶樂喜身高懷聊避寵幽境更隨人樹
密添新籟叢香續故春娑娑榮路友偏倚此相親

夏夕雨霽

積晦空空卷繁蒸此夜收峯催雲去夏珪伴月迎秋樹
老殘烟入庭虛爽氣留長康惟半點孤詠費冥搜

北亭

舊壁橫空苑危亭納夕霏野蟲多各韻倦鳥忽同歸木
落驚秋晏人愁念昨非生平嵩穎志尚或拂塵衣

早春北亭見城隅荒寂

荒城樓堞少野色徧高低蔓草無名綠幽禽取意啼天

形岡樹北日脚嶺雲西不覺凝笳動春風引夕輦

寓居襄內宰邑者數見存訪因成謝

謝病非三最為岷之一屢何言羅爵尉時駐舄鳧仙華
轍交深巷餘香襲故羶猪肝難設具應作憫生憐

得充國書報都中葺所居初成輒以自慰作一首
寄子京

昔貴三公第今營一畝居聊堪避燥濕兼欲貯琴書
默密猶思騁鷗巢不願餘長安窮僻地吾亦愛吾廬

送晏延平宰邑分寧兼過鄉墅

銅組腰新綬烏衣省故廬鄉無夜行諺楹有世藏書楚
潦蘭浮檝潘園板御輿蚩蚩吳俗美庖刀一投虛

送靜海高簿

城闕曙烏啼行人歎解携舊歡革鹿散新意棘鸞棲淮
月涵孤蚌江雲雜斷霓流沙應構賦春澥正平隄

魏花千葉

露曉移珍樹丹房一紺幃綃輕無奈疊霞碎却相依
縹

日香難斂擎風力自微他時零落恨千片為誰飛

晏歲

晏歲無情晚陰飈昨夜聞芳條臨檻勁短日轉樓曛苔
石收蒼暈冰溪疊素紋蒿蘭雖異種霜至若為分

早春雪後見辛夷初發

冒霰初分葉驚春已作花鮮于紫艾綬殷過赤城霞花色

淺于紫
深于西

破蓓香囊小銜趺彩筆斜俗號木筆
皆其形似騷人雖麗

思忍作挂旗車

楚詞有辛夷車
結挂旗之語

秋夕池上

月御橫霄陸溪樓敞夕霏神龜荷裏宿仙驥露中飛屏
簾風推暑攀條客念歸冶城空極望憂樂意多違

和友人晚出池上

節物更徂候幽衿屬釣臺蘭苕魚佩長桂葉學旗開鵲
避驚弦去魚隨晚餌來謝塘多藻思弭蓋一相陪

次韻和王密學冬暮書事

歲晏陪京守心閒俗自安斗城供近望天幕借餘歡秀

句然其待幽經濯手看不因郵問數誰識政條寬

小橋

野水危梁渡凌虛一徑橫鄭車求代涉漢權且專行濠
詠觀魚樂圮書踈履情斜陽葭莢岸鷗鳥為誰驚

姚黃

世外無雙種人間絕品黃已能金作粉更自麝供香脈脈
翻霓袖差差剪鵲裳靈華餘幾許遙遺菊叢芳

歲晚餞客南亭二首

偶作津亭餞還驚歲物非蒼葭無際合黃葉有聲飛別
恨隨人遠鄉心著酒微猶欣見山色紆轡暫忘歸

亭上
遠見

江南
山色

淮壤窮南界亭臯坐渺然平窺京口樹斜落海門天重

霧多藏日寒潮不送船

江岸堰高行船必以潮為迎
送冬月水漸小俗曰寒潮

江

山寧有助私作楚騷憐

遙夜

夜夕更籌永霜飛歲籥空斗杓常記候蟾暈豫知風過

鴈驚流弋哀螢戀故叢
可堪鄉思發夢繞兔園東

竹雞

羽族何微眇交交作好音
遠聞真似語寂聽本無心
倦舌沈荒塢嬉羣聒翠林
鷓鴣王佐筆從此異凡禽

元憲集卷三

欽定四庫全書

元憲集卷四

宋 宋庠 撰

五言律詩

鬪鷄

對壘迢迢地
雙鷄滅玉塵
長鳴非後郭
利嘴欲專秦
鳴領聊延敵
鷹揚願殺身
君恩定多少
引距即隨人

春渚

淵上照滄淪吾纓此濯塵風清琴籟細波浸沼毛春處
喬蛟何待鳴雖驚自馴直鉤聊適興底處餌文鱗

晚霽

斷續簷聲歇徘徊隙影賒歸雲衝樹破殘雨入樓斜徑
綠都成草叢薰尚隱花便同江海思春水照軍牙

負暄

旭日東南霽霜天病骨寒心同陽藿展志鄙夏畦難東
洛貂裘壞西華葛被單嵇慵聊自樂愛景始三竿

惠泉

濟物功偏厚朝宗勢不迷一航容宋葦六斗異涇泥
溢呼魚轍光分抱甕畦寧同南國詠酌飲變夷齊

有釋子以禪會圖貺余者此圖即今駙馬都尉李
公所製繪故楊大年劉子儀及都尉環禪師等信
一時之盛集瞻歎不足因成紀詠

法集超初地工毫構妙緣星占世外聚月寫相中圓指
指誰標論心心自默傳惟應阿堵處俱是到忘筌

對月

蕭寂東軒坐徘徊月馭來風休涼暈缺句破晚弦開紫
漢沈星樹仙莖逼露杯誰憐故林鵲終夕自驚猜

得告上冢

拜墓標唐令褒親漏漢恩永懷淒欲寄忠訓藹如存宰
樹錦城陌農疇潁曲村異時裁叙傳容或記臯門

立秋後一日涼風蕭瑟便若感人

倏忽徂炎罷驚秋自此辰殘蛸空愛露孤扇欲辭人嵩

少千尋嶺滄浪萬里津如何一乘興烟策弄颿輪

河陽秋思六首

潘岳有秋興賦謝惠蓮有秋懷詩今作秋思

關外山河闊城邊卉木腓露濃蟬始罷風急燕猶飛不
雨雲中薄澄沙水自微善哉吾祖嘆能此送將歸

自古悲秋物多傷黯黯魂鱷魚輕客宦紈扇感君恩
瀨寒明野蒿雲側露村此中知止地歸去掩柴門

芳序雖云晚華顛亦已新蛩鳴偏傍耳燕去不辭人
山隱棲巖路朝嬰佩玉身故溪應更好前夜夢垂綸

出處因年警多慙與願違於陵終不仕疏傳幾時歸江
柳寒陰瘦畦菰晚葉肥寄聲溪上鳥且莫背人飛
久雨收寒潦層颿蕩薄埃鳴蛙鼓吹歇高雁弟兄來食
肉嗟謀短關弓任世猜故園三徑在新菊幾叢開

秋物自能晚秋聲何足悲歡聲隨壯去病已與衰期斗
遠終難挹天高不易欺此心邱壑戀匪石恐難移

雨霽

曉雨纔收潤高軒一爽神雪峯將變夏桃蘂漸辭春霽

隙微陽淡陰墻積蘚勻空餘稚圭宅蛙響徧諸隣

小圃雨霽

風雨殘秋罷年芳遂悄然黃花沉暮蝶蒼柳嘯孤蟬霽

日高彌淡曉霞冷不鮮忽聞雙鶴唳心斷故谿田

家養雙鶴

兼秋多唳

霽後

小雨春膏潤微波晚照空壺光遙送電梁影半傾虹珍

樹疎烟合坳塘暗溜通義皇誰可上靖節有牕風

綾景陽寺丞與韓綜監簿蔡襄秀才雪夕會飲聯
詩數十韻以相示因成詩句

歲籥愁雲暮朋簪夕宴開賢如潁川聚興是剡溪來瀾
酒蟾波溜雕章燭刻催三英知絕擬況復是平臺

漢濱北樓

一水東流闊諸峯右轉深蟾規欲破暈天杵不盈尋浦
逗分風席洲喧避繳禽憑高機事息併為漢川陰

晨謁宮門小雨初過

宮漏籤聲急天街雨脚微
曉寒凌禁樹春氣裛朝衣
瑞霧輕猶濕香塵重不飛
難人傳鑰出華旭滿彤闈

淮上

晚歲清淮路淹留數問津
風平天合水舟進樹迎人
飢鷺貪魚沒高鴻望渚遵
楚鄉梅柳意相慰似先春

北樓

地迴樓堪倚天長日更勞
何須雲渺渺況自葉騷騷
脫兔橫岡遠冥鴻避弋高
四愁休徧詠俱是一雷袍

次韻和北京太師丞相潞國公創作茅齋

地僻誅茅後堂幽構厦餘誰知冶城望更作傳巖居淨
供香厨飯真籤蕊笈書因公高世想轉憶舊田廬

廢書

斷簡孔堂壞遺經汲冢虛漫求芸辟蠹先歎魯成魚舊
帛愁連盖亡篇恨蠟車吾家先訓在楹鑒晏生廬

初春置酒河上得前忠武記室饒廷評書因成感
詠以寄

故歡清溪上今醉濁河邊素領添新髮春風似去年暖
雲邛北樹芳草鞏陰田感舊情何極重看記室牋

得天經書問

久卧堪憂巷驚聞不減書高風五柳外深意八行餘努
力邀加飯相逢約下車殷勤長跪讀雙睫費連如

禁中寒蟬

何處幽林蛻來依禁樹鳴風綏非冒寵露腹祇知清曉
韻飄飖闕殘嘶逗綠甕秋蟬多怒臂寂寞好全生

楚辭
云寒

蟬寂寞
而無聲

感秋二首

夕軒疎雨罷物物為秋驚
病葉先風落寒蟬趁候鳴
西飛愁燕急左界恨河傾
借問三江客鱸魚底有情

歲事催人事榮心伴客心
驚驂收畫扇螳臂感瑤琴
夕露繁將滴朝雲薄亦陰
金貂寓直省潘興轉難任

杜門

苦宇切郊寰荆扉度歲闌
賓綦秋薜合童唱暮薪還
石

上春梁苦塙東避世難戾戾猶可爨誰訪陋居願

謀退四首

勤勤念耦耕不是釣虛名皓魄圓猶缺芳卮滿故傾佩
韋防事急分肉倚心平此意將誰語臨深坐冶城

常聞疏少傅知足遽辭官祖道賓儀盛揮金里宴歡畏
途非蠖屈高志自鵬搏行路賢哉歎吾心良所安

昔日於陵子遺榮自灌園三分輕國爵一世謝人諠野
笠鋤春隴橫棹汲曉源區區冒榮者天壤亦何言

濟世才無取登朝運所遭濡鵜真竊祿汗馬本非勞漢
重商賢隱克嗟顧客高古今閒自況何翅九牛毛

秋日漫興

天淡雲摧陰風清水始波暗蟲催紡緯驚鵲報填河

時

夕前一日宮扇紈規掩仙盤露彩多空餘歸客恨芝朮老巖

阿

晚庭

蒼靄秋霖歇高軒夕景遲桐凋金井恨蘭老玉琴悲巢

燕寒初失風蟬晚屢移黃昏禽語闌相喚宿何枝

送王秀才下第

春色鄉枌老波聲客棹催林烏貪夕哺都鷁怨風摧處
晦囊中穎加餐案上杯重來期歲晏飛藻石鄒枚

送明州章從事

東國有嘉招歸心越絕送幾程淮蚌月一信海鮪潮蓮
渚熏談席霞天認賦標時平軍版息麗藻入雲謠

郡圃洗心亭宴坐對春物因書所見

盡畫山楹坐居然外物身野葵能向日怖鴿解投人萬
萼融朱蠟平蕪識紺茵須知無事處堪養不才臣

宿齊太一宮寄天休

入暮鳧鐘警乘涼鵠帳褰霧來燈欲濕螢過草疑燃野
氣樽浮桂幽香席藉荃無因招傲吏同宿一壺天

殘春夜雨

春色無情老宵雲有恨低輕寒借鴻駛早暝入烏啼晦
燭風生幔漂花溜漲溪滴階兼被草聊此沉淒迷

寒野

芳歲行道盡高堂興耿然林號欲風野雲綻已霜天烏
彩疑留日鴻聲似惡弦幽衿忽忘返更為月娟娟

正月三日作

迎春纔十日

是年立春在故歲
季冬二十三日

應月已三冀池面開新

素山光復舊青灰飛空玉瑀醅動漲金瓶刺作尋芳具
當筵忌獨醒

奉送滁州趙學士



灼灼書林彥胡為江海濱希遷杜陵客出守始平人夕

夢矯階遠

君早膺記注之選

前驅隼旆新離觴君莫翹去去易

沾巾

代書寄奉寧樞密直諫議學士

故秋嘗假道倏忽改芳年三疊黃河上千花白髮邊冰
消牛口渡山綠虎牢天東望無人會滎陽太守賢

憂閑詣臺先寄獻臣天休二學士

去國三年恨還臺九死餘淒涼曾奎栗感咽晏楹書鮒

勺懷窮轍鷄棲整故車惟當親益友敘濶費漣如

春野五首

衡華負城開春兼野色來烟扶霽日柳雪惱故年梅波
影魚先動林聲鳥並催欣欣羣意悅病骨獨遄回

陂色入柴關陽和遠近還平蕪隨蹇步新水照衰顏廢
堞鳥聲樂晴臯雉羽斑一逢樵客語無埃辦連環

近出東郊道時巾下澤車田溝蛙拖紫沙徑鳥留書木
引藤絲遠墻蒸菌蒂虛幽懷聊俯仰無意事施遽

沃野周原接遙陂鄭洧連鬱葱中縣氣南北富人阡鳥
騁因風野虹生欲霽天斜陽墟落外牛羊食春田

夕藹收芳甸春高徧宿芰朝虹先雨出寒鴈後陽來遠
木芊芊茂幽花脉脉開欣逢老農語爭席坐林隈

林下

偶作中林適聊觀萬化春蜂窠喧似市禽舌巧于人陂
溜鳴田尾藤梢衣樹身鄉農時晤語野意合天真

郡圃海棠初開追憶學士院玉堂後西軒此花最

盛置酒有感

昔作瀛州賞今逢汶水春
可憐無並色來對始衰人
溫樹遙知漢仙桃尚記秦
臨樽如舊識爭忍判芳辰

寄題奉寧樞密直諫議新葺漱玉齋

聞說西齋水潺湲逼畫楹
雖添新寶響不改故源清
花落波浮亂杯遲屈曲行
無因陪夜宿同賞瀑巖聲

次鞏縣

昔走成周道春風尚落花

頃歲春末
赴洛陽

今馳河內傳秋日

正臨霞山色依前綠顛毛只是華見迎多故吏衰壯兩

驚嗟

洛陽故吏皆
迎余于道

病臂痛踰月不能御刀筆

百疾乘衰運雙肱怯痺搖身知九折痛肉訝半分銷掉
市將誰羨拘原莫我邀惟堪楚林下如槁學承蜩

傷死馬

辨道曾資智嘶風忽絕音故蹄休踐雪朽骨詎酬金附
尾護蠅散投鞍嚙鼠侵棄惟宜一報盡力有前箴

涉淮沂清迫於冰涸舟次下邳先寄彭門趙侍御

二首

病骨憂南土孤懷念北遷
欣承紫泥詔且向汶陽田
夜雪淮冰合朝暎海氣鮮
風波雖繚繞自有故交憐

此地淮壖極連櫓北轉初
風烟寒背楚陂澤遠通徐
葆髮驚秋外葵心戀闕餘
不憂芳歲晚松柏自扶疎

元憲集卷四